



Ny Baiboly ho an'ny ankizy
dia manolotra

Raha namorona izao
tontolo izao
Andriamanitra




Nosoratan'i: Edward Hughes
Sarin'i: Byron Unger; Lazarus
Nampifanarahin'i: Bob Davies; Tammy S.
Nadikan'i: Fikambanana "Ndao mba hiaraka aminay" na
association "Allons ensemble" FJKM Nazareta Amborovy
Mahajanga Madagascar
Novokarin'i: Bible for Children
www.M1914.org

BFC
PO Box 3
Winnipeg, MB R3C 2G1
Canada

©2013 Bible for Children, Inc.
Azo atao ny fandikana na fakana ity tantara ity
nefa tsy ho amin'ny fitadiavam-bola.




Iza no namorona antsika olombelona? Ny Baiboly, ny tenin'Andriamanitra, dia manambara ny fiandohantsika olombelona. Taloha ela be, Andriamanitra dia namorona ny lehilahy voalohany izay nantsoany hoe Adama.



Andriamanitra namorona an'i Adama tamin'ny alalan'ny vovon-tany. Nitsofan'Andriamanitra fofon'aina mahavelona tao ambavoron'i Adama, ary dia tonga nanan'aina izy. Rehefa vita izany, napetrak'Andriamanitra tao amin'ny zaridaina mahafinaritra iray antsoina hoe Edena izy.



Talohan'ny namoronany an'i Adama, Andriamanitra
dia nanao tontolo tena tsara feno zavatra
mahafinaritra.




Miandalàna no namoron'Andriamanitra ny havoana sy ny lemaka, ny voninkazo mani-pofona sy ny hazo avo be, ny vorona tsara loko sy ny renintantely mpimonomonona, ny trozona goavambe sy ny sifotra maditidity. Raha fehezina dia, Andriamanitra avokoa no nanao ny zavatra rehetra

misy eto amin'izao
tontolo izao.




Talohan'ny naharin'Andriamanitra izao rehetra izao, dia tsy nisy n'inon'inona tety afa-tsy Andriamanitra irery ihany. Tsy nisy olombelona, tsy nisy tany, tsy nisy rano. Foana! tena tsy nisy na inona na inona! Tsy nisy izany maizina sy mazava izany, tsy nisy ihany koa izany hoe ambony sy ambany izany, tsy nisy ny omaly sy ny ampitso.


Fa Andriamanitra irery no tao. Nandray fanapaha-kevitra Andriamanitra hamorona tontolo vaovao.




Tamin'ny voalohany,
Andriamanitra
nanao ny lanitra
sy ny tany.




Tsy nisy endriny sady foana
ny tany. Feno haizina
nandrakotra
azy. Ary
Andriamanitra
niteny hoe:
"Misia ny
Mazava".



Dia nisy ny Mazava. Andriamanitra niantso ny mazava hoe "andro" ary ny maizina hoe "alina". Dia nisy ny maraina sy ny hariva. Andro voalohany izany.




Tamin'ny andro faharoa, Andriamanitra nampisaraka ny rano ho ranomasina, renirano, ary farihy. Ny andro fahatelo, Izy niteny hoe: "Aoka ho hita ny tany maina". Dia hita izany.




Nandidy ny ahimaintso, ny voninkazo, ny fakan-kazo
ary ny hazo hitsiry Andriamanitra. Ary
dia nitsiry izany. Ary nisy ny
hariva sy ny maraina.
Andro fahatelo izany.




Nony avy eo, Andriamanitra nahary ny masoandro, ny volana, ary ny kintana maro be tsy vitan'olombelona isaina. Ary dia nisy ny hariva sy ny maraina. Andro fahaefatra izany.




Ny biby miaina any anaty rano, ny hazandrano, ny voro-manidina no nataon'Andriamanitra manaraka nony avy eo. Ny andro fahadimy Izy, namorona ireo karazana hazandrano lehibe sy madinika, ireo ôtrisy lehibe lava ranjo, ary ireo voronkely mpisiontsioka falifaly lalandava.




Namorona karazana
hazandrano marobe
Andriamanitra,
nameno ny rano
rehetra teto
an-tany. Nanao
karazam-boromanidina
maro be ihany koa izy,
nameno ny tany sy ny
habakabaky ny lanitra.
Ary dia nisy ny hariva
sy ny maraina. Andro
fahadimy izany.



Taorian'izay, niteny indray Andriamanitra nanao hoe: "Aoka ny tany hamoaka ny zava-manan'aina isan-karazany". Ary tanteraka izany, ka nivoaka avokoa ireo karazam-biby maro samihafa: biby fiompy, bibikely, biby mandady sy mikisaka, araka ny karazany avy. Araka ny karazany avy. Toy ny Elefanta goavambe sy ny lalomena. Malai-mihetsika.




Ny Rajako fetsy ratsy sy ny voay
donendrinendrina. Ny kankana miolakolana sy ny
jaboady mipitipitika sahisahy. Ny jirafy lava tenda
sy ny saka kely miraondraona. Tamin'io andro io no
namoronan'Andriamanitra ny karazam-biby rehetra.
Ary dia nisy ny maraina sy ny hariva. Andro
fahaenina izany.



Namorona zavatra hafa
ihany koa Andriamanitra
tamin'io andro fahaenina
io - zavatra tena miavaka sy
hafakely mihitsy! Efa vonona
daholo ny zavatra rehetra
andraisana ny olombelona.

Efa feno sakafo tany
an-tsaha, efa nisy biby
afaka hanompo azy
ireo ihany koa.




Ary Andriamanitra niteny hoe: "Andao isika hanao olona tahaka ny endrintsika. Ary izy hanapaka ny zavatra rehetra eto amin'izao tontolo izao" ARY ANDRIAMANITRA NAMORONA

NY OLONA ARAKA NY ENDRINY, ARAKA NY ENDRIK'ANDRIAMANITRA NO NAMORONANY NY OLONA ...



Andriamanitra nilaza
tamin'i Adama hoe:
"Afaka mihinana
izay tianao rehetra
ato anaty zaridaina
ianao, afa-tsy
ny voan'iry hazo
mampahafantatra
ny tsara sy ratsy iry
ihany. Raha mihinana
ny voan'io hazo io
ianao dia ho faty
tokoa".



"Tsy tsara raha irery ralehilahy. Andeha hanaovako namana sahaza ho azy izy". Nentin'Andriamanitra teo anoloan'i Adama avokoa ny karazam-biby amam-borona rehetra nisy. Nomen'i Adama anarana fiantso azy tsirairay avy izy ireo.



Mety tena nahira-tsaina tokoa i Adama matoa nahavita izany an! Saingy tsy nisy, na dia iray akory aza tamin'ireo vorona sy biby rehetra ireo, namana mba mety ho sahaza an'i Adama.




Nampatorian'Andriamanitra
i Adama. Ary dia nakany ny
taolan-tehezany, ka dia avy
amin'izany no namoronany
ny vehivavy. Ny vehivavy
noforonin'Andriamanitra dia
tena namana tonga lafatra
tokoa ho an'i Adama.



Tao anatin'ny enina andro no namoronan'Andriamanitra ny zavatra rehetra. Nony avy eo, Andriamanitra nanamasina ny andro fahafito, ka nanao izany ho andro fialan-tsasatra. Tena sambatra sy niadana aok'izany tokoa i Adama sy Eva niaina tao anatin'ny saha Edena.



Nankato an'Andriamanitra izy ireo.
Andriamanitra izay sady Tompo, no
Mpiahy, ary Naman'izy ireo.



Raha namorona izao tontolo izao
Andriamanitra

Tantaran'ny Tenin'Andriamanitra, ny Baiboly,

Tao amin'ny bokin'ny

Genesisy 1-2

"Ny fanambaràn'ny teninao dia manazava."
Salamo 119:130





Tapitra



1



60



Ny tantara ao amin'ny Baiboly dia miresaka amintsika ny amin'Ilay Andriamanitsika mahafinaritra, Izay namorona antsika ary maniry ny hahafantarantsika Azy.

Fantatr'Andriamanitra fa manao zava-dratsy foana isika, izany no antsoiny hoe "fahotana". Fahafatesana no sazy ho antsika noho ny otantsika, saingy tian'Andriamanitra tokoa isika ka nomeny Jesosy Zanany ho faty teo amin'ny hazo fijaliana, mba ho voasazy noho ny helontsika. Avy eo nitsangana tamin'ny maty Jesosy, ary niakatra any an-danitra! Raha mino an'i Jesosy ianao, ary mangataka Aminy mba hamelàny ny helokao, dia havelany tokoa izany! Honina ao aminao Izy, ary ianao honina miaraka Aminy mandrakizay.

Raha te-hibebaka hiala amin'ny fahotanao ianao,
dia izao no afaka lazainao amin'Andriamanitra:

Ry Andriamanitra ô, mino aho fa maty ho ahy Jesosy, ary velona Izy ankehitriny. Miangavy Anao aho, Tompo ô, midira ao amin'ny fiainako, ary mamelà ny heloko, mba hahazoako fiainan-baovao, ary ho avy ny andro handehanako eny Aminao ho mandrakizay. Ampio aho ho velona ao aminao, tahaka ny Zanakao. Amena.

Vakio ny Baiboly ary miresaha amin'Andriamanitra isan'andro!
Jaona 3.16

